

Kayëta ixinëm ir Piyer in

Lilaya in

Akayëta aŋo ex akinëm and yëgwën babi Piyer bamara band okëreceŋ band lapar bani gë bëlaŵënel bënëgwëš baŋ. Në end osëy'ali or fudac orebën eŋ, bërëw'ak bëranjëm wëlandëra babi do bani wëkarënd në end ine ko legëanaxënegund Axwën an ga re baxo mëne gogo ko bakaw. Piyer a'yëgwën këbi mëne Axwën an axo degënanand na. Barikan a'buŋa ko buŋand xali ala kala exo nëngwët ola orexëm ol do exo teb beñëŋëanax beŋ. Er ex gër akayëta in:

End or šenene do gë end bëlaŵënel eŋ: 1.1-21.

End ekwëyëta ed osëy'ali or onëgwëš eŋ: 2.1-22.

En ošën or omakaw ond Axwën eŋ: 3.1-18.

Ecëmar el

1 ¹ Wëno Simoŋ Piyer, ariyenin do parëxanda ir *Yesu *Kërisët an, këjun yëgwënëlinde kayëta ijo wën bër gë ekwëta ed xëbënëk ang edebi ak bën, pa'b gë or šenene or Kaxanu do gë Afexën Yesu Kërisët ol. ² Oyekax ol do gë obetak ol bašërël ex gër ndewën ga nang kënebi ako Kaxanu do gë Yesu, Axwën arebi an.

End oxëreceŋ eŋ

³ Kaxanu ayël yël këbo gë panga indexëm in dëŋ dek bebër kë y'ana ene diyaxënënde ang ex ola or Kaxanu ak mëŋ ar w'acëgu këbo gë enjaran endexëm eŋ do gë ekëbëanaxik endexëm an. ⁴ Pa'b gë enjaran eŋo do gë ekëbëanaxik eŋo, yël këbo Kaxanu bebër bey'a babo bën, en koraxën en cana osëmbak or gër ngwën ol or oñandi oñëŋëanax ok do en cotaxën ola or Kaxanu ol. ⁵ Awa në end eŋo dëŋ, kemënayin gë obal osëm en bašaxën gër ekwëta edewën owerëgweran ol, do gër owerëgweran, onangëran ol. ⁶ Baš'in gër onangëran, egi ed gë anjus el do gër egi ed gë anjus el, ekemënal el. Baš'in gër ekemëna, epëb ed Kaxanu el. ⁷ Bëte baš'in gër epëb ed Kaxanu, ebalër ed gër aminëmëra and oxëreceŋ el do gër ebalër ed gër aminëmëra and oxëreceŋ, aŋana aŋ.

⁸ Enimin, angëmëne benjekax beŋo ahi hik gër ola orewën do ex ñëmb, an ñana na en bayind gë bandixa banjekax këm, an gi na gë odëwë'rëwën këm, gër enang ed Yesu Kërisët, Axwën arebi el.

⁹ Barikan ar šanëk beŋo an, axo watërand na aye, xali hi ko ang

ašiwëk fo. Axwëya xwëya ko angunëtan and bamena band baxo rind and ganëka aŋ.

¹⁰Bëte bëmaŷe, kemënaŷindën en balëkënali nëmëc oŷac or wac këjun do gë eyata ed yata këjun Kaxanu el. Angëmëne mondako kën rind, din an pokër na. ¹¹Ata Kaxanu mondako këjun fërëtënaŷën ebët eŷangax, en dilaŷën gër owun or din ir din or Yesu Kërisët, mëŋ ar ex Axwën arebi do Afexën arebi an.

¹²Mëŋ ex bëte, wëno din këmun ŷana mun kwitanënd beŋo ga nang kën anëka do lëkaya kën däl ir šot kën in. ¹³Yëla këme aye yek, nand bayi këme gër eman eŋo na, mun nëngëtënd gë bend këmun xwitanënd beŋo. ¹⁴Gayikwa Yesu Kërisët, Axwën arebi an, anangën nangën ke mëne gogo këme šës. ¹⁵Barikan gë oxor oram ol këme ri mun tebëtanaxën er këjun ŷana eŋun kwitanënd, nand ex yo, beŋo dëk.

End enjaran eŋ

¹⁶Enimin, biyi ex otede od watëk ola oxëbënaxik or *Yesu *Kërisët, Axwën arebi ol gë bangës bandëbi baŋo dëŋ. Anangën nangën këmun panga indexëm iŋ do gë omakaw ondëxëm oŋ, xarak ax gi ex na gë bendacan bend xamën këni bela. ¹⁷Gayikwa Faba Kaxanu yël këŋo or gapak ol do gë enjaran aŋ yatir wëli bax oniŷ orexëm ol gër enjaran ekëbënaxik eŋo ga kë re: «Ajo ex Asëniŷën ar pëlöt gër yomb iram an, wëno monëgan ke nënganënd endëxëm eŋ^a.» ¹⁸Biyi dëŋ wël bax oniŷ olo ga wëliwëk gër orën and ebami gë Axwën *Yesu *Kërisët ŷaŋ gër etënd emënëk aŋ.

¹⁹Biyi cëŋ, er rey'a këni bëlaŷënel in, er mokwëta nëmëc ex. Awa wën aŷap ŷapëk eŋun balënd end eyëŷan elo eŋ. Er hik ang lambo ir kë hōband gër ecamëdan fo xali ex canayaw angoben aŋ do emal ed oxeya el ex hōband gër oŷëkw orewën. ²⁰Damana beŋo dëk, anang nang kën mëne gër Oñëgw Omënëk, eyëŷan ed alaŷënel ed ex anjëlan and ala, ax gi ex na. ²¹Gayikwa, alaŷënel abax yëŷanënd ex na ang baxo yëland ak. Angoc Amënëk aŋ babi ŷasinënd bëlaŷënel bën gër onden ondebën end Kaxanu end këni rey'a eŋ.

End bësëŷali bënëgwëš eŋ

2¹Akarëk aŋ, bëlaŷënel bënëgwëš hi bax na gër bulunda ir Isërayel. Bëte mondako fo këni xani bërëmar mërëxand irewën eni gi bësëŷali bënëgwëš, eni dälaliw benëgwëš bend kë

nabelind do eno y'axëtand Axwën an, mëñ ar racët këbi an. Ata bëjo mocala këni şaland enemi ed bërëxadët el. ² Bëranjëm këbi sëf gër anıyan atëmbak andebën, do bësëxen bën në endebën këni y'ana eni cirënd fëña ir dal in. ³ Bësëy'ali bëjo, ga han këni napul in kënun y'ana enun yifand gë bend këni yerëtënd bën fo beñ, enun d'ëxëlëxaxënënd. Barikan kiti indebën in elod anëka fo wël bax, do enemi edebën el ax gi ex na mocëni!

⁴ Omeleka od wëndëra bax ok, Kaxanu aņo kañënan bana endebën eñ. Alap lap këbi gër ambëxw atiwax do xap këbi gë ogwey'ele-gwey'ele gër acamëdan ang gë gwey'ele-gwey'ele fo eni cënixën kiti in. ⁵ Bëte Kaxanu ala w la w babi gë o'yëm ol, bela bësëmbak bër ebax akarëk bën, angwën and baxo femërand Nowe end anıyan and şenene aņ. Barikan fexën këbi Nowe do gë bela bëcongëbëxi bësëxe. ⁶ Bëte Kaxanu anëp nöp babi bër gër Sodom do gë Gomor bën and bëlën ko bangol baņo aņ. Mondako ri baxo eni nangaxën dek bësëmbak bën mëne mëñ axiti ko xitind. ⁷ Barikan aracët racët baņo Lot, mëñ ar şenene ar bax xo'yërand, në end eñac end bëwëşik bëjo eñ. ⁸ Gayikwa ar şenene ar bax liyand gër bangol band Sodom do gë Gomor aņo, key yo key baņo y'ambënënd gër emëkw ed şenene edexëm në end eñëñenax end baxo watënd do baxo wëlënd eñ. ⁹ Awa eņo këbo wasinënd mëne Axwën an aham xam ko edacët ed bër şenene gër ocëmu el. Barikan afeni këbi fenind bësëmbak bën ebi nöpaxën yatir kiti. ¹⁰ Adofa anëp këbi nöp bër këbi y'etëy'etënd edi ed bemuyaraxik bën, bër kë xaşërënd gër edi ed oñandi od eman do këni y'epënënd or gapak or Axwën bën.

Bësëy'ali bënëgweş bëjo, axwëta xwëta këni ogaf odebën ok do arafëna këni rafënannd mëne ani yëdand na ecir ed bangoc bacaraxik band gër orën el. ¹¹ Xarak omeleka od xuca këbi oja w do gë panga ok dëñ anëbi nöpënd na, ani kwëşand na gër lëngw ir Axwën Kaxanu enëbi cir. ¹² Barikan bën ari këni rind ang bër gë onden këm fo, ang o wacar fo, o wacar or eñaş or xwël kënëbi do enëbi da w xali eni bër ol. Aşir këni şirënd er bayik ani nang ex na in. ¹³ Osëmbak orebën olo axana këni xana ang acosa fo. Monëngan këbi nënganënd eyëlaya ed gër oñandi od eman ogës od bela dek el. Oşëfën orewën ex and këni y'ow gër ed kën fedër ñambëran aņ, opëna odewën ok këni buyarënënd. ¹⁴ Bangës bandebën baņ yer orekar fo ex, do din abı pedënd na eñëñenax eñ. Ayifa kënëbi yifand bela bër sitarak bën, monjëlaya yëlaya këni gër aņana and kodı. Ata bëjo obaş or xata këbi fo exëni. ¹⁵ Ga seb këni fëña ir şenene in, nambëraxën këni ga sëf këni fëña ir Balam, asëni w ar Bosor in, mëñ ar han bax acosa and exo

dixën osëmbak an. ¹⁶Barikan fali, mëne ngëj emacar, yey'an bax ang ala fo do rexëra baŋo në end amena andexëm, alaŵënel ar šenëkët baŋo an, xali xwëšan këjo.

¹⁷Bësëy'ali bënëgweš bëjo, ang bandu band gë men këm fo exëni; ang ebed ed šapërelik ekoc fo exëni. Ata bën šëni këbi acamëdan aŋ. ¹⁸Gayikwa ahebëta këni hebëtrand eni dey'a bend gë ofëcak këm, bend gë ndafënan itëm. Mondako këni rind enëbi yifaxën gë oñandi oñacaxik od eman ok bela bër šanëguk gë ojaŵ fo gër otaxan od bër kë liyand gër enambëran bën. ¹⁹Bela bëjo abey'a bey'a banëbi mëne aniyand and y'ay'a kënëbi yël, xarak bën dëj okadëp od bebër kë nemind exëni. Gayikwa ala kala xadëp ir er wëña këjo hi ko.

²⁰Enimin, angëmëne aseb seb këni bemuyaraxik bend gër ngwën ro beŋ paŋ gë enang ed nang këno Yesu Kërisët, Axwën do Afexën arebi el do eni bakan beŋo xali ebi bëña gašëxe, awa nëmëc këni nëxena ang nëxena bani añanar ak. ²¹Er fecadox këreni nang dona aniyand and šenene aŋ, gë eni nang aye dëj, do eni mašan epoy'apela amënëk and sëy'ali kënëbi aŋ. ²²Awa bën anëka hi këbi eyey'an ed ðal ed orenik ed kë rend: «Laŋët ij anëka bakan ko exo y'amb er wis baxo in^b.» Bëte: «Ambëxwëbëxw anëm and buyi bano ecede-ecede aŋ, anëka rëgwaya ko gašëxe gër egway.»

End omakaw ond Axwën eŋ

3 ¹Wën bëmaŷe bënd ke balënd mbaŋ bëjo, kayëta ixinëm in këmum yëgwënëlin. Gër okayëta oki oko, këmum xwitanënd bend nang kën aye beŋ, en nëngëtaxën gër onden ondwën.

²Ata kën y'ana en kwitand bend rey'a këni, akarëk aŋ, bëlaŵënel bëwënëk beŋ do gë apela and oparëxanda odwën aŋ, apela and ex and ar ex Axwën do Afexën arebi aŋ. ³Nangin mëne ðamana beŋo ðek, gër bakey bapelatari, bela bër kë sëfënd oñandi oñëjënax do këni sanënd mbaŋ kë šanayaw na. ⁴Do are këni y'ana eni dend: «Feye ngwa exo ar bey'a bax mëne abaka ko bakaw an? Gayikwa elod ga rašëra këbi gër ecës bëxarëk bën, bëy bën ang ebax elod and yanak ngwën ak bayik^c.»

⁵Enimin, bëjo mama dëj këni xwëyand mëne akarëk aŋ, paŋ gë eyey'an ed Kaxanu el hixënëk orën ol do gë ebar el, do ebar el šanëguk gër men do xangëk. ⁶Ngwën ind angwën aŋo ij šilipa bax kwëc gër amen. ⁷Xarak Kaxanu, gë eyey'an elo fo re ko ašor

^b2.22 Andorenik 26.11

^c3.4 Esayi 5.19

ko šor orën ol do gë ebar ed gërëgako el yatir kiti ind këbi nemin bela bësëmbak iņ.

⁸Barikan emat ex end ax gi ex na mokwëya eņ, wën bëmaÿe bënd ke balënd mbaņ bëņo: Gër Axwën, akey amat gwër fo ex gë bëniy wëli do bëniy wëli gwër fo ex gë akey amat. ⁹Axwën an axo dëgënanđ na gër eņata ed er beŷa ko, ang këni yëland bërëmar ak. Ga këņun buņanënd ko šëniđ wën đek en nëngwët đek ola orewën ol gayik aņo ñandi ex na ala exo nemi.

¹⁰Barikan akey and Axwën aņ, ang arek fo kë ŷow. Yatijo, orën ol ašapër kë šapër gë ongëbër oņigëanaxik. Bëbër ex gër orën gë xodux bën, ex pëtëra. Ata ebar el, gë bebërexëm bën ex wati ang ex ak. ¹¹Awa gayikako bebijo đek afët kë fët, wën nëkonin ba mondake ŷapëk en điyand! Gë ola owënëk do gë epëb ed Kaxanu ¹²ŷapëk en cëniđ do en ñandënënd akey and Kaxanu aņ, akey and kë fëtëra bebër ex gër orën gë xodux aņ. ¹³Xarak biyi ašëni këne šëni nde bebër beŷa këbo Kaxanu bën: orën oxašax do gë ebar ekašax, gër ed kë xëñ or šenene ol. Ata biyi eņo këne šëniđe.

¹⁴Wën bëmaÿe bënd ke balënd mbaņ bëņo, awa gër ošën olo, kemënayin eņun təkati Axwën an bëwënëk, bër gë etëmbak këm, gër aketëxeta. ¹⁵Pënileņun mëne ebuņan ed buņan këņun Axwën arebi el ex apexa andewën aņ, ang ŷëgwën këņun bëte Pol, mëņ imaÿe ind këbo balënd mbaņ iņo, gë orenik or šot ko ol. ¹⁶Mondako ko ŷëgwënd Pol gër đek okayëta odexëm and ko yeyanënd beņo aņ. Barikan bengas exëna bend lakëk epëni. Ata bër sitarak gër onden do ani piri ex na gër onangëran bën, anëngwët këni nëngwëtënd er kë rend in. Ado mondako fo këni rind gë Oņëgw Omënek ocëxe ok do këni neminayand gë andebën aņ dëņ.

¹⁷Awa gayikako gana gana fo nang kën beņo, wën bëmaÿe bënd ke balënd mbaņ bëņo, perënayin đe këdi kënebi sëfa bela bëwëšik bëjo gër enambëran edebën do en teb ekemëna el. ¹⁸Barikan piriyin gër oyekax do gër enang ed *Yesu Kërisët, Axwën do Afexën arebi el. Mëņ xwënëk enjaran eņ, gërëgako do xali din ir din! Amen!